

國朝耆獻類征初編

國朝耆獻類征初編

國朝耆獻類徵初編卷四十三目錄

卿貳三

明安達禮

孫憲德
冒孫夢麟

甯古哩

羅碩

孫阿爾多

覺羅果科

費茂公

子荆山
孫德音

納都瑚

尼滿

上官鉉

杜篤祐

龔佳育

李爽棠

董篤行

姜希轍

姜永燦

龔士育

吳協

劉顯榮

即次聖

歐陽三

國朝耆獻類徵初編卷四十三

通奉大夫前署江西巡撫江西布政使司布政使湘陰李桓輯

卿貳三

明安達禮

孫憲德

曾孫夢麟

明安達禮蒙古正白旗人姓西魯特世居科爾沁父博博圖太

祖高皇帝時率七十餘戶來歸卽授爲佐領俾轄所屬太宗文

皇帝天聰元年隨征明錦州歿於陣予三等輕車都尉世職明安

達禮襲兼管佐領崇德三年任護軍參領隨貝勒岳託征明由密

雲東北毀邊牆進同都統伊拜擊敗明太監馮永盛兵攻克南和

縣六年隨大軍圍錦州敵據山巔列陣明安達禮率所部護軍衝

擊敵潰遁松山敵騎來犯復擊敗之我師鑿壕駐守敵兵出錦州
城奪橋明安達禮擊卻入城 上親督師敗明總督洪承疇三營
步兵明安達禮奮勇力戰又擊敗敵騎敘功晉二等輕車都尉七
年冬隨貝勒阿巴泰征明薊州薄燕京破明總督趙光抃軍又同
前鋒統領阿山擊走三河縣步兵進略山東八年春師還明總兵
白廣恩張登科和應薦等巡哨螺山明安達禮率所部擊之潰又
同護軍統領鼇拜破明總督范志完軍凱旋 賚白金是年擢禮
部參政兼正白旗蒙古副都統 世祖章皇帝順治元年隨大軍
入山海關擊敗流賊李自成二年隨英親王阿濟格征自成於延
安府七戰皆捷招撫鳳翔等府降者三十餘城三年改兵部侍郎

值蘇尼特部騰機思與弟騰機特叛明安達禮隨豫親王多鐸率師往征扼據險要騰機思等聞風遁走明安達禮乘夜追逐至鄂特克山大破賊眾斬其台吉茂海復同鎮國將軍瓦克達等追剿手斬十一人獲其輜重並擊敗土謝圖汗及碩雷汗兵五年擢正白旗蒙古都統七年兼任兵部尚書先是敘入關征流賊及征騰機思功晉爵至二等男世襲罔替嗣以考滿並遇恩詔晉一等男加一雲騎尉八年以議敘福建湖廣大同軍功遲延削雲騎尉罰鍰九年列議政大臣復遇恩詔晉二等子十年以徇隱興安總兵任珍擅殺事覺罷尚書任降世職爲一等輕車都尉兼一雲騎尉十一年統兵征鄂羅斯敗敵於黑龍江十三年上以明安

達禮在部日久練達庶務授理藩院尙書十五年十二月 命爲
安南將軍率師駐防荊州十六年海賊鄭成功犯江甯明安達禮
率師赴援賊船千餘艘泊三山峽明安達禮督兵擊敗僞都督楊
文英等擒斬僞副將一獲船艦器械甚多賊退竄入海明安達禮
旋奉 詔移師浙江駐防舟山十七年還京仍授兵部尙書 聖
祖仁皇帝康熙三年考滿加太子太保六年調吏部尙書旋因疾
致仕八年二月卒 賜祭葬如典禮諡敏果子都克襲

右 國史館本傳

憲德

憲德蒙古正白旗人姓西魯特氏祖明安達禮官至吏部尙書有

傳父善官頭等侍衛康熙五十七年憲德由廕生授理藩院主事
尋遷刑部員外郎雍正二年遷郎中四年二月授湖北按察使四
月奏臣抵任有原任布政使張聖弼來謁查係虧空革職擬斬監
追之犯臣牌行武昌府立拏監禁 諭獎其秉公執法十月擢巡
撫五年三月請於漢口鎮增設巡檢一員分巡居仁由義二坊以
循禮大智二坊隸舊巡檢轄部議 從之先是四川夔州府知府
程如絲自販私鹽而捕楚民之私販者槍斃甚眾川陝總督年羹
堯劾之適四川巡撫蔡珽威偏重慶府知府蔣興仁自盡被劾至
京 召見陳冤抑且力保如絲爲四川第一好官事下甘肅巡撫
石文焯亦言其冤抑如絲遂免逮擢四川按察使至是年羹堯敗

上閱其黨汪景祺逆書備載如絲貪殘不法珽受如絲重賄及
文焯妄斷狀於是 命侍郎黃炳赴川覆按其事且 諭憲德將
楚民被害者查帶往鞫已而鞫實如絲珽擬斬決文焯永停給俸
憲德尋調四川巡撫疏言川省驛鹽茶三項向皆臬司兼管稽覈
未周請增設驛鹽道專司其事 詔如所請尋請設鹽茶大使
從之九月疏言成都府灌縣都江堰口廟祀秦蜀守李冰之子二
郎相傳父子鑿山穿江溉田至今民享其利請 賜封號疏下部
議封李冰敷澤興濟通祐王二郎承績廣惠顯英王十一月奏各
屬增設裁改事宜一復設成都府之華陽縣增知縣教諭訓導典
史各一裁府屬之稅課大使一改資縣爲直隸資州轄仁壽資陽

并研內江四縣裁縣原設之典史改縣州爲直隸州轄德陽安縣
竹梓潼四縣改茂州爲直隸州轄汶川保二縣及各土司裁威州
併入保縣一馬湖府應裁所屬屏山縣歸敘州府通判移駐馬湖
舊治轄雷波等各土司部議如所請是月奏程如絲在監自縊

上嚴飭之六年正月疏言上年程如絲斬決部文到在十月二十
九日而京報小鈔前五日已到洩漏實由於此請將各省提塘通
行裁革 上以提塘之設由來已久未便遽革 諭九卿確議尋

議提塘多係微末職銜承充且無保送不實處分請令各督撫於
本省武進士及候補候選人員內揀選咨部頂補地方官出結有
犯分別議處又安置入川人戶事宜一人戶眾多該管官挨查取

結編入保甲一戶口姓名人數移查各原籍有犯事故者逐回餘酌撥地畝令墾一願回籍者不必給口糧將姓名人數咨明本籍川省仍造冊存案再至者懲之一川省無著地畝見在清丈事畢應分科則編字號計畱川人戶之數按畝均分認墾三月又請畱川人戶以一夫一婦爲一戶給水田二十畝或旱地五十畝兄弟子姪成丁者丁給水田十五畝或旱地二十五畝一冊內老幼丁口多不敷養贍者臨時酌增俱給照票並牛種口糧分年升科均如議行七月疏言夔州關稅向委知府監收請照許墅淮關例差監督一員徵課按年輪替十一月請改成都府同知爲管糧水利同知經理都江以下各堰工並從之尋請令清查地畝之員搜

查鹽茶積弊

諭曰川省鹽茶二項既經特設道員專司其事自

應責成該道令其公誠督察期於清楚儻不能勝任卽屬溺職當予參黜另用賢員今乃言該道亦茫然無端委則設立專官何爲耶至於差往科道京員係爲清理地畝以免豪強之爭奪兼安插流民之得所儘足辦理矣若又將鹽茶等事交手經營便寬予限期豈如該道之久在川省可比稽察過急必致騷擾民間滋生事故脫有遺漏將來反得推卸且據汝奏內搜查挨查之說更屬謬妄鹽茶積弊相沿已久自應商酌從容清理之法安可如此嚴急從事觀汝一切料理處過緊而欠通變只圖己身免咎而已不肖擔當從利害實心任事於此一奏心術畢見非朕委信之意也嗣

後當深以爲戒十二月奏於達州拏獲年羹堯案內要犯靜一道人得旨議敘加一級七年正月奏天全土司改流等事一天全改爲州設州吏目各一駐礪門州同分駐始陽一天全州應隸府轄請升雅州爲府設知府經歷各一增置附郭一縣設知縣典史各一卽以新置之一州一縣及名山榮經廬山三縣歸府轄從之尋定雅州附郭縣曰雅安十月疏言川省州縣先因地廣事簡將雙流等縣裁併今生聚日繁請復其舊成都府復設雙流崇甯彭三縣縣州復設彰明羅江二縣重慶府復設大足璧山定遠縣夔州府復設大甯新甯二縣潼川州復設安岳縣眉州復設彭山青城二縣嘉定州復設威甯縣設知縣訓導典史各一裁羅江驛

驛丞驛務歸知縣管理裁打箭鑪沿村二驛驛丞驛務歸雅州同知及鑪定橋巡檢管理十二月疏言黎大所地方爲西南孔道漢夷雜處請裁原議之千總改置一縣隸雅州府轄設知縣典史各一以典史分駐泥頭又建昌之甯番衛已改爲冕甯縣應裁去冕山所千總部議從之尋定黎大所新設縣曰清溪八年正月請新設甯遠府漢境內擇大村堡照義學例建學舍延塾師令熟番子弟俟學業有成往教生番子弟如所請行四月署川陝總督查郎阿奏言川省墊江忠州等屬奸民楊成勳等造妖謠吹螺嘯聚事覺成勳自縊獲其黨陳文魁楊成祿等訴狀恕白等稟內列丈量田地科派需索累民等事有禍冤起於戊申年奉旨清丈民

田及上憲愛民如子察冤如神之語 諭曰四川清丈之舉始於馬會伯之奏朕惟恐不便於民諭令憲德悉心酌議以定行止隨據憲德奏稱蜀省昔年以來人民稀少田地荒蕪及至底定歸復祖業者從來未經勘丈是以多所隱匿迨歷年既久人丁繁衍奸猾之徒欺其界畔無據遂相爭構訟今應明白曉諭令將所管田畝分立地界各執本名立戶載入版籍每年納糧俱以串票爲據如此則侵隱欺奪之患可以悉除又川省詞訟爲田土者十居七八大率爲界址不清亦非勘丈無以判其曲直憲德之奏如此朕又詢問岳鍾琪據奏與憲德之言相同隨交九卿會議九卿亦以應當舉行合詞覆奏朕於是慎選科臣高維新等前往辦理

伊等陛辭之日諄切訓誨務期剔除積弊安插善良並非爲加增賦稅起見又復頒發諭旨百姓果有冤抑下情准其數十人同到督撫及欽差官員衙門控告爲之秉公審理此從前遣官清丈之始末也其勘丈造冊等費俱令動支帑金各官供應等項俱令從公支給不使幾微煩擾閭閻上年冬月丈量之事將竣朕又念各屬徵糧科則輕重懸殊其田地肥瘠不等則賦稅自難畫一又復降旨凡隱瞞科則等處止據實按則更定至於額糧稍重之州縣卽比照就近適中地方之科則令其覈減以紓民力今年正月憲德以清丈事竣具本代達州民謝恩之詞稱通省士民咸稱清理疆界使強無兼併弱無屈抑又荷鴻慈將田不敷糧之戶悉予開